

同州府志

第三函
函六冊

隋

李衛公上金天王書

無號年行書在華嶽廟

廣川書跋世傳扶餘國事類若劍俠而衛公從之似以
任縱自喜然攷其行事則動以禮法自約又若老書生
此書豪武自將亦旣放矣或疑其僞將其暴侮神羞求
合於杳冥者乎亦當時憤激感慨豪氣未除而然耶劉
餗嘗言衛公訴神且請告以官位所至詞色抗厲後有
聲曰僕射好去後果如言此書殆似或真有是耶將後

人因此附益之乎。餽在開元中，其說似有據，若可信也。東里集有唐李衛公布衣時上西嶽書真跡，蓋厭隋亂已極，負濟世之志，奮欲有爲而咨之神明之辭也。士重乎立志，養氣衛公此書志已先定而氣蓋宇內矣。是以卒能輔明主而建功業焉。其書亦佳，石刻在廣西，余得之劉長吾僉事云。

弇州續藁李衛公上西嶽書不見正史，意者影響之談，如虬髯客傳類耳。其書亦似唐末五代人筆，雖不見整栗而微有意。衛公將畧爲唐初第一功，最大故好奇之。

士多傳之

書畫跋跋虬髯傳果影響之談若衛公此書則或非出傳會第有之亦不足爲衛公奇也英雄固時有此等事衛公後功業顯故傳不然亦山谷間一妄語耳

石墨鐫華此好事者誣衛公而爲之書詞可笑而唐劉餗言之又小說載公射獵行雨事殆異人不可以常理論也書三種潞州者崇寧間刻藤縣者紹興間刻西岳廟則近刻筆亦道逸王元美稱之當是潞州本藤縣者不及近刻又下矣

關中金石記此碑乃後世好事者所刻就文義觀之應是衛公未遇時所爲考唐書本傳靖初仕隋爲殿內直長大業末遷馬邑丞故附置于此

金石萃編按李衛公上西嶽書不署年月唐書本傳作公以貞觀二十三年薨年七十九推其生在陳宣帝大建三年辛卯北朝爲齊武平二年周天和六年後梁天保十年其仕隋至大業末爲馬邑丞其初爲殿內直長大約在仁壽大業之間計其年三十左右矣此書自稱布衣作於未仕之時則在二十餘歲也年少氣盛志在

功名其家在京兆三原地近西嶽爲書告神理亦宜之
但其上書之時正文帝平陳之後亂象未形文中社稷
凌遲宇宙傾覆姦雄競逐郡縣土崩之語又何所指亦
非智深勇沈者所當出此故論者皆以爲妄人僞作殆
不誣矣靖仕唐陪葬昭陵碑文見後

唐

華嶽精享昭應之碑

開元八年立咸廩撰文劉升隸書李休光題額在華嶽
廟

關中金石記李休光舊作光休誤蘇頌以是年正月罷
相爲禮部尙書碑云舊相尙書許國公與史正合升史
作昇有傳

金石文字記華嶽精享昭應之碑其文卽刻於後周天
和二年頌碑之陰宣碑之右旁有顏魯公大字題名乾
元元年十月左旁有賈竦謁華嶽廟詩元和元年十月
作并書太和六年四月姪男宣義郎行華州參軍琬重
修碑之下方亦有唐人題名此碑前後空處爲宋人攬
入題名甚多幸正文皆八分書題名或隸或行不相混

耳廟中古碑嘉靖末地震多毀唐碑惟此與述聖頌二
通僅存 古碑陰多無刻字故後周之碑而唐人得以
刻之觀此一碑而周人之質樸唐人之謙約兩見之矣
按此爲華陰縣主簿咸廩而新唐書趙冬曦傳有大理
評事咸廩業亦開元時人恐卽是一人

金石錄補右碑彭城劉升書升素以書名如造觀音像
徐州刺史蘇訥碑行於世此碑隸法古勁無唐人氣習
可愛也

金石存密趁王室是邇字變彳作走省爾爲尔也懋廣

疇咨卽咨字增口爲日也旣亭家位當是享字與銘詞
中克誠攸亭同帝有畧爲是步字變比爲二口也三國
志注引會稽典錄吳孫亮時有山陰朱育依體像類造
作異字千名以上魏書太武帝始光二年三月初造新
字千餘頒之遠近以爲楷式故李仲璇修孔廟碑魏孝
文弔比千文之類皆雜用篆籀隸楷以及變體別構之
字然此風自唐以來久變不謂至開元時劉君乃獨嗜
之耳又碑中如皇帝天子等字或空四字五字或空六
字十字不一惟我皇及帝字平格前天子字空六字銘

文明明天子句又復平格皆不知其義

潛研堂金石文跋尾攷蘇頲以開元八年正月罷相爲
禮部尙書本傳不載遣禱雨岳事闕之也碑左方又有
八分書蓮華巍巍竹箭喧匝浩浩今古憧憧往來十六
字則銀青光祿大夫守兵部尙書博陵郡開國公崔漢
衡所題而華陰縣令盧倣書其時興元元年十二月也
又有銀青光祿大夫檢校華州刺史上柱國李休光題
額二十字驗其字體亦出盧倣手蓋勒碑之後又六十
餘年而始題其額耳碑前兩行下半空處有貞元元年

二月檢校水部員外郎崔頌華州司功參軍鄭齊聃華
陰縣令韋綬三人題名其下則宋元豐五年正月通直
郎劉陶題名碑中空處又有政和壬辰二月顯謨閣直
學士席旦及子奎益題名其餘明人題名不及載

授堂金石跋碑在嶽廟尙全整金石文字記跋此謂古
碑陰多無刻字故後周之碑而唐人得以刻之然攷水
經注樊城西南有曹仁記水碑杜元凱重刻其後書伐
吳之事蓋古人簡便不重煩如此又渭水內載漢文帝
廟數碑一碑是建安中立漢鎮遠將軍段熲更修祠堂

碑文漢給事黃門侍郎張昶造昶自書之魏文帝刻其
碑陰二十餘字此又碑陰刻字在杜征南之前者若至
近世磨滅往代碑碣欲以自張其迹未幾而亦頽殘作
柱礎矣

金石萃編按碑云歲在涖灘皇帝以開元嗣極之八載
也歲在申曰涖灘開元八年歲在庚申也下云間自日
在奎雷始電迨乎畢春氣達萌芽山川如焚密雲不雨
仲春之月日在奎則是一春大旱也兩唐書元宗紀八
年皆不書春旱而七年則舊史書七月以亢陽日久上

親錄囚徒新史書閏七月以旱避正殿徹樂減膳慮囚
五行志則并七年秋旱亦皆不書史文之詳略不同如
此資治通鑑則七年不書於八年正月書大旱有魑優
人作魑狀戲于上前云云則八年之旱正月已然矣下
云分命舊相尙書許國公蘇頌以瑞祝之辭旅于西嶽
傳稱頌自景龍後與張說以文章顯稱望略等時號燕
許大手筆帝愛其文令別錄副本署臣某撰當畱中此
時以旱因令頌撰祝辭并往祈于西嶽也是年正月頌
罷相爲禮部尙書俄檢校益州大都督長史碑故稱之

爲舊相尙書而其禱西嶽則在未檢校益州之前也撰
文者宣義郎華州華陰縣主簿平陽咸廩開元時有咸
冀爲十八學士之一圖形含象亭又咸廩業唐書附趙
冬曦傳由大理評事入集賢院修撰坐事左遷餘杭令
似與此撰文之咸廩皆不合姑識之書碑者殿中侍御
史彭城劉升唐書作劉昇附見劉德威傳云德威彭城
人德威子審禮審禮弟延景延景子昇開元中累官中
書舍人太子右庶子能文善草隸似卽此劉升惟不言
其官殿中侍御史與碑不同耳篆額之李休光無傳碑

書用字俱闕筆作用

明皇華山銘殘字

開元十二年十一月立明皇撰文並隸書在華嶽廟
關中金石記今只存駕如陽孕四字駕如者仙駕如聞
句也陽孕者陰陽孕育句也碑爲黃巢所燬故自歐趙
以來不著錄

述聖頌

開元十三年六月立達奚珣撰序呂向撰頌並正書在

華嶽廟

石墨鐫華碑在華陰縣岳廟中達奚珣撰序呂向撰頌
并書不著年月攷呂向開元中召入翰林此碑稱集賢
殿直學士當是開元中立碑云藻翰自天發揮神化建
碑於廟以光寵焉又云樹之平地巖若斷山六龍盤薄
紀其上羣神離立負其下當是頌元宗所建華岳碑也
今其碑已裂跌尙存如山上存二字大可徑四寸許分
隸不減太山銘而呂向此書尙完在一道士院中向書
昔人稱其草隸峻巧又能一筆環寫百字號連綿書

金石文字記碑陰上方有韓賞告嶽神文韓擇木八分

書下方有大厯九年華陰令盧朝徹謁嶽廟文有貞元九年十三年題名左旁有乾元二年張惟一祈雨記右旁有上元元年華陰縣令王宥等題名李樞書上爲篆下爲八分

金石史元宗所建華嶽碑已燬尙存塊石巋然如山頌稱其光洞納不可復見至云巋若斷山眞成碑識又云羣神離立負其下髣髴猶存尙餘兩字徑數寸甚奇偉飛動恍如龍翔鳳舞昔向曾以美人賦諫幾死張說爲請卽拜補闕賜銀章朱紱不可謂不遇也建碑時帝修